

বাংলা বার

# চীনা বিশ্ববিদ্যালয়ে বাংলা বিভাগ চালু হচ্ছে

কালের কণ্ঠ ডেস্ক >

চীনের বেইজিং ফরেন স্টাডিজ ইউনিভার্সিটিতে আগামী বছর থেকে বাংলা বিভাগ চালু করা হবে। চীনের বেইজিং ফরেন স্টাডিজ ইউনিভার্সিটির উপপরিচালক অধ্যাপক ড. মা লিনের নেতৃত্বে একটি প্রতিনিধিদল গতকাল বুধবার ঢাকা বিশ্ববিদ্যালয়ের উপাচার্য অধ্যাপক ড. আ আ ম স আরেফিন সিদ্দিকের সঙ্গে তার কার্যালয়ে সাক্ষাৎকালে এ কথা জানান। অনুষ্ঠানে চীনা প্রতিনিধিদলের আরেক সদস্য চীনা আন্তর্জাতিক বেতারের বাংলা বিভাগের কো-অর্ডিনেটর ইয়াং ওয়েই মিং উপস্থিত ছিলেন। এ ছাড়া ঢাকা বিশ্ববিদ্যালয়ের উপউপাচার্য (প্রশাসন) অধ্যাপক ড. সহিদ আকতার হুসাইন ও অ্যাকাউন্টিং অ্যাড ইনফরমেশন সিস্টেমস বিভাগের সহযোগী অধ্যাপক ড. মিজানুর রহমান উপস্থিত ছিলেন। ঢাকা বিশ্ববিদ্যালয়ের এক সংবাদ বিজ্ঞপ্তিতে এ কথা জানানো হয়। সাক্ষাৎকালে দুই বিশ্ববিদ্যালয়ের প্রতিনিধিরা ঢাকা বিশ্ববিদ্যালয় এবং চীনের বেইজিং ফরেন স্টাডিজ

ইউনিভার্সিটির মধ্যে শিক্ষা ও গবেষণা সংক্রান্ত যৌথ সহযোগিতামূলক কার্যক্রম চালুসহ পারস্পরিক স্বার্থসংশ্লিষ্ট বিভিন্ন বিষয়ে আলোচনা করেন। প্রতিনিধিদলের সদস্যরা জানান, বেইজিং ফরেন স্টাডিজ বিশ্ববিদ্যালয়ে আগামী বছর থেকে বাংলা বিভাগ চালু করা হবে। এ ক্ষেত্রে তারা ঢাকা বিশ্ববিদ্যালয় কর্তৃপক্ষের সহযোগিতা চান। ড. আ আ ম স আরেফিন সিদ্দিক চীনের বিশ্ববিদ্যালয়ের বাংলা বিভাগ চালুর ক্ষেত্রে সম্ভাব্য সব সহযোগিতার আশ্বাস দেন। এ বিষয়ে শিগগিরই একটি সমঝোতা স্মারক সই করার ব্যাপারেও তারা একমত হন। বেইজিং ফরেন স্টাডিজ বিশ্ববিদ্যালয়ে বাংলা বিভাগ চালুর উদ্যোগ গ্রহণ করায় উপাচার্য অধ্যাপক আরেফিন সিদ্দিক চীনা প্রতিনিধিদলকে ধন্যবাদ জানান। তিনি আশা প্রকাশ করেন, এই উদ্যোগের ফলে বাংলাদেশ এবং চীনের মধ্যে বিরাজমান বন্ধুত্বপূর্ণ সম্পর্ক ভবিষ্যতে আরো জোরদার হবে। সূত্র : বাসস।